

A2^r

WJe löblich vnd fürfichtig/dye kunft/
 auch zucht vnd vbunge/ Rei militaris/ das ift/ der
 Ritterlichen brauchung/ Jn Kryegßleüffen vñ reytterey (wöl
 liche vor andern künften/ aller groffen Reychen/ Lande vnnd
 Stette/ ein gebererin vnnd ftyffterin/ billich geheiffen wirdt)
 durch allte löbliche langkherkommen/ vnnd gebrauchung vn-
 fern Elteren/ mitt mercklichem fleyß vnnd aufffehen/ erler-
 net/ bewert vnd erobert ift/ So fordert vernunfft follich allte
 erbar vnd nutzlich herkommen fleyffig zûuerzeychnen (fonderlich/ wo es zû merunge
 vnd nutz dem Rômifchen Reyche komen mag) vnd dem fürften des Reychs zû zefchrey-
 ben/ vnd offensaren/ So dan du Allerdurchleüchtigefter/ Großmächtigter fürft vnnd
 herre Maximilian/ durch götlichsfürfehunge/ des Rômifchen Reyches/ ein gewöltiger
 Kayfer/ herre vñ verwefer bift/ So wilich deyner großmächtigen Kayferlichen Maie-
 ftat/ vnderthänig/ bemelte Vier bücher/ zû Teüfch mit yren bolwercken/ gerüften/ als
 Katzen/ Antreyben/ Ziechthürnen/ Streytwägen/ Schyeßzeugen/ Wendtwägenn/
 Feüwerpfeylen/ Fußeyfenn/ Wafferzeugenn/ Widdern/ Steyglaitteren/ Schöpff
 zeugen/ Vberwerffenden brucken/ Sturmzeugen/ Kugeln/ Schlingen/ Vallzeugenn/
 Brechzeugen/ Grabzeugen/ vnd andern gebeüwen zû der Rytterfchafft in kryegeleüf-
 fen gehörig/ mufterlich mit yren figurn/ wie die zûbrauchen feind/ zûfchicken/ Dann dei-
 ner Kayferlichen Maieftat kunft vnd tugent/ mag allen deinen vnderthanen mercklich
 en nutz bringen/ wie wol dein großmächtigkeit in Kayferlichen vnd fürftlichen tugendē
 vnd kryegßleuffender Ritterfchafft/ vnd aller ander fürfichtigkait/ mylte vnd groß be-
 gnadet/ vnd die bewerlich geübet hat/ So wirt doch erfahrung vnd beachüh dife kunft
 neben deiner Kayferlichen Maieftat allen hohen/ mittelen vnnd nydern ftenden/ nicht
 wenig nutz bringen/ Dann wie vier wagenräder/ zû gleich notturfftig vber ein feld lauf-
 fen/ Also befchreyben vnns/ Julius/ Frontinus/ Helianus/ Modestus/ vnnd Vegetius/
 gantz brauchlich vnd loblich/ auch einhellig/ die kunft vnd vbunge der Ritterfchafft/ zû
 lernen vnd ordentlich zûuerbingen/ Dadurch wirdt das rômifch Reych gefterckt/ dye
 feld erbawet/ vnd das land befchyrmert/ Dann die Lacedemonyer/ vnd darnach die Rö-
 mer/ haben folliche kunft vnd tugent/ Jn groffen eeren gehalten/ vnnd dadurch im an-
 fang/ ift das Rômifch reich/ mittugent vnd gütten anfhlegen (von geryngen vrfpryn-
 gen)in groffe machtt vnd öberkeit kommen/ vnd durch follich Ritterliche vbunge vnd
 fitten/ großlich vnd mercklich zûgenomēn/ zû letzft alle dife welt beftrytten/ auch vnder-
 thänig vnd gehorfam gemacht/ Mit was weyßheit/ vorteil/ vnd hoher vernunfft/ Sci-
 pio der Edeler Römer/ feine anfhlege gemacht/ vnd die mächtige ftatt Cartago/
 gewonnen/ vnd erobert hat/ wie mannlich vnnd Rytterlich/ er den nachkom-
 men/ vnd die mit den wercken vollentreckt/ vnd volendet hat/ ift offen-
 bar/ Darüb das gegenwertig werck/ eym yedern/ der fich in Ritter-
 lichen oder Weltlichen fachen brauchen vnnd vben muß vnd
 foll/ wol zû nutzraychen würdet. Darauß nympt der alte
 weyßheytt/ vnnd der Junnge mannheytt vnnd ge-

fchicklikeyt/ darauß erlanget yegklicher regierer
feines lands vnd volcks/ glücke vnnd fige/
vnd ficherunge feynes lebens/ Aber
jr vnnwyffen/ bekümmert/ ver=
derbet vnnd zurftöret land
vn̄ leütte/ Derhalb ift
fie für ein fonder=
liche zûflucht
zû liebē vn̄
zû hal=
ten.

A ij